

GLÉSIE FURLANE E CELEBRE UNE MESSE PAR FURLAN PAR “RINGRAZIÂ” LA CONFERENCE EPISCOPÂL TALIANE (CEI)

O cjapìn at de decision de CeI e par “ringraziâ” i vescui talians che a àn votât cuintri de aprovazion dal Messâl Roman par furlan o celebrarin une messe in lenghe furlane domenie ai 26 di Novembar dal 2023 aes 15.00 inte gleseute di sant Jacum, su lis rivis dal Tiliment, a Vilegnove di Sant Denêl (si jentre par Vie Zara): o prearin in lenghe furlane, cul Messâl par furlan sul altâr, cemût che o fasin di plui di 50 agns e lu fasaran cun ducj chei che a volaran preâ insiemi cun nô.

Il Messâl par furlan al è stât fermât di gnûf de CEI (Conference Episcopâl Taliane componude di 231 vescui).

Dopo dal prin stop di 17 agns indaûr al Messâl par furlan al è stât dineât di gnûf l'aval dai vescui talians: e coventave la maiorance cualificade dai 2/3 che al significhe che a saressin coventâts i doi tierçs di chei che a àn drit (154 su 231 totâi); il risultât al è stât ben diviers: 173 che a àn votât cun 114 a pro, 50 contraris e 9 astignûts.

La posizion de CEI no nus maravee propit, ma e reste la amarece pal tant lavôr puartât indenant in chescj 50 e passe agns pal ricognossiment dal Messâl in lenghe furlane.

Par trente agns nus àn dit che la lenghe furlane no jere une lenghe ricognossude dal Stât: come se la liturgjie religjose (de Glesie) e ves di dipendi de legislature laiche di un stât.

Cuant che intal 1999 e je stade aprovade la leç n 482 che e tutele lis minorancis linguistichis storichis, nus àn fat spietâ altris 17 agns parcè che la Tertia Editio Typica e veve di jessi voltade prin par talian: come se une lenghe minoritarie cemût che al è il furlan no podès vê la traduzion prime de lenghe taliane.

Cuant che ancje il talian al è rivât insom de traduzion, ai prins dal 2023 nus àn obleât a zontâ la traduzion di dutis chês parts zontadis ae version taliane che no son par latin: come se il nestri Messâl par furlan nol ves di dipendi de version uficiâl latine, ma de traduzion taliane...

Cumò ancjemò un stop: al è un gnûf segnâl, se al coventave, dal clime une vore negatîf cuintri des lenghis minoritariis e la mancjance di atenzion pai lôr fevelants.

E intant che la “Glesie di palaç” e continue a dineâ al popul furlan un drit sacrisant, dineant la autorizazion al Messâl Roman par furlan, la societât civîl e somee che e sedi plui atente de jerarchie religjose: o disin graciis ai tancj rapresentants des istituzions regjonâls aministrativis e culturâls, e no dome, che di plui bandis a àn stigmatizât la decision contrarie de Conference Episcopâl Taliane. Apontament duncje domenie ai 26 di Novembar dal 2023 aes 15.00 inte gleseute di sant Jacum, su lis rivis dal Tiliment, a Vilegnove di Sant Denêl (si jentre par Vie Zara).

GLÉSIE Furlane su internet www.glesiefurlane.org e www.facebook.com/glesiefurlane

GLÉSIE DI SANT JACUM A VILEGNOVE DI SANT DENÊL SU GOOGLE MAPS:
<https://bit.ly/GlesieFurlaneSanGiacomoVillanova>